

# In sboz da lescha per abitaziuns secundaras

Ils Grischuns mussan la via

DA LUCAS DEPLAZES / ANR

■ **En sia decisiun davart l'applicaziun da l'iniziativa per abitaziuns secundaras ha il tribunal federal appellà al parlament da formular uschè spert sco pussaivel la lescha latiers. En vista a la prescha ha ina delegaziun grischuna en il parlament federal elavurà in sboz da la lescha e preschentà quest ier a las medias a Berna.** Sco quai che cusseglier naziunal *Heinz Brand*, pps, ha punctuà davant la pressa, èn tut ils chantuns da muntogna pertutgads da l'iniziativa davart la restricziun da construir abitaziuns secundaras. Cunquai che l'iniziativa è formulada mo fundamentalmain ha ella provocà bleras dumondas e procurà per ina gronda malsegirezza sin il sector da construcziun. Perquai ha ina gruppa da parlamentararis grischuns considerà urgenta l'applicaziun da l'iniziativa che sto vegnir concretisada en la lescha. La nova lescha duai dismetter uschè spert sco pussaivel la gronda malsegirezza, procurar per la segirtad guridica e per in tractament egual dapertut. En concordanza cun la regenza grischuna e cun agid d'in spezialist per dumondas da construcziun suttamettan trais parla-



**Trais parlamentararis grischuns han preschentà ier in sboz per ina lescha davart la construcziun da segundas abitaziuns suenter ch'el suveran ha acceptà l'iniziativa da Franz Weber.**

mentaris grischuns in agen sboz da lescha. Brand ha fatg attent ch'il sboz respectia la decisiun dal tribunal federal.

Per cusseglier dals chantuns *Martin Schmid*, pld, è la finamira da la proposta grischuna d'accelerar il proceder legislativ daventà urgent. Sco quai che la pratica demussa datti actualmain bleras dumondas da dretg che ston vegnir scleridas senza retard. L'iniziativa acceptada dal pievel è da respectar senza dubis. Necessari saja uss dentant da far diever dal spazi d'agir che l'iniziativa haja laschè avert, ha fatg attent Schmid.

*Stefan Engler*, pcd, ha concedì che la via da la delegaziun grischuna n'è betg la via usitada da relaschar ina lescha federala sin fundament d'ina iniziativa. Dentant saja ussa necessari da sclerir la situaziun intscherta uschè spert sco pussaivel. L'applicaziun e l'intepretaziun da l'iniziativa populara è l'incumbensa dal parlament. Concret sa tracti d'impedir la construcziun d'abitaziuns secundaras senza cunfins en intgins lieus. La delegaziun grischuna fa ina purschida e vul cun quai prestar ina contribuziun constructiva per ina schliaziun che garante-scha ina applicaziun eguala en tut il territorii.